

左恪靖侯奏稿續編

恪靖奏稿續編卷二十一目錄

追剿逆回大勝營平董志原賊巢慶涇肅清摺

劉松山剿除綏德叛卒收復州城摺

審明戕害高連陞領逆擬辦完結收輯成營摺

請開漢中鎮總兵伍維善缺卽以李輝武借補片

請將甘肅收捐之道府州縣展限片

追剿逆回大勝蕩平董志原賊巢慶涇肅清摺

奏爲官軍追剿逆回連獲大勝蕩平董志原賊巢餘眾
北竄慶涇各屬一律肅清現籌布置情形仰祈

聖鑒事竊官軍追剿逆回蕩平賊巢業經臣等於三月

初一日先將大畧情形馳報續據各軍收隊回防先後

稟報該逆自二月初八日敗遁回巢紛議北徙復聞臣

宗棠率師西指各路馬步剋期大舉恟懼益甚遂於十

八日集議肅金鎮併十八營爲四大營以其半護家口

輜重先行留崔魏馬正和等率悍黨萬餘伏董志原斷

後時出游騎數百出秦昌政平等鎮分擾澤河兩岸以
牽綴官軍維時陝安道黃鼎自邠州率師會固原提督
雷正綰於長武記名提督馬德順二品頂戴陝西補用
道李耀南亦率馬步各軍屯駐靈臺百里西屯鎮一帶
均遵臣等前檄儲備十日乾糧伺賊竄動卽銳進追之
二十二日探報賊老弱輜重均已離巢分向驛馬關三
汭河北竄晨刻雷正綰黃鼎率師自長武渡涇午後馬
德順李耀南亦率馬步各營由靈臺踵至均會師於秦
昌時精悍賊眾悉伏葭志原僞元帥崔槐等率騎千餘

扼三不通憑藉抗拒是夕各統領會商以賊既萃於三
不通則荔家堡西路必空虛無備議以雷正綰撥所部
總兵陳義步隊六營馬德順派所部提督楊世俊馬隊
四營由秦昌入荔家堡取蕭金鎮西路以達鎮原迎頭
截剿餘軍分爲四隊以李耀南所統恪靖馬隊爲前鋒
馬德順馬隊繼之雷正綰黃鼎馬隊爲左右翼各軍步
隊隨後排列而進均由三不通一路直搗城巢會商已
定二十三日五鼓各軍秣馬蓐食分道進攻辰後行至
邱家寨該逆游騎數百瞥見卽遁各軍風馳電掣直抵

三不通時賊騎千餘排列卡外官軍馬隊徑前衝撲賊恃險力拒鎗砲紛注如雨馬隊往來衝擊均爲深溝所限卒不得前正相持間適步隊各軍分出左右路踰溝衝上平原繞出賊卡之後賊驚駭失措馬隊乘勝衝入搶轟矛擊賊不能支紛紛敗竄原上伏賊甫出抵禦又爲敗賊牽動相率狂奔官軍跟踪緊追斬殺千名復分軍循馬連河而上遂將焦村什社蕭金鎮董志鎮一帶賊巢同時踏燬沿途百餘里賊屍枕藉拋棄騾馬軍械無算餘賊策騎飛馳悉向西峯鎮北走是夕各軍駐董

志原二十四日五鼓拔隊跟追辰後抵西峰鎮據擒賊
供稱賊前起老弱輜重因人馬衆多未能疾遁相距不
過一日之程其殿後悍賊爲各軍追逼漏夜奔竄一由
驛馬關以出環縣一由蒲河川以向三汊河約在黑城
子下馬關會齊同竄豫望城半角城金積堡一帶維時
前派之提督楊世俊總兵陳義兩軍自荔家堡上原出
西路掃蕩而前沿途斃賊甚衆已將鎮原縣城收復當
經各軍統領會商雷正綰李耀南步隊出蒲河川會合
楊世俊陳義馬隊於鎮原追剿三汊河一股其竄駟馬

關環縣之賊則馬德順黃鼎率馬步緊追之午後馳抵驛馬關及賊尾隊各軍爭先馳擊斬落後賊十餘名追二十里至黨家腰線山徑偏仄兩旁溝深數十丈賊大隊擁塞急不得脫崔巍馬正和等見勢危急親督悍黨數百人阻隘死拒官軍奮威衝殺鎗礮矛刺立斃悍賊十餘回目撥馬先逃餘逆紛紛敗竄人馬自相蹂躪墮落坑塹者無算官軍追殺五十餘里約共斃賊數千名連夜躡蹤窮追二十五日收復慶陽府城二十六日追至蔡家廟沿途斬殺又多餘賊竄過環縣由紅德城一

路北走各軍追之不及遂於二十七日收回董志原其
雷正鎰李耀南兩軍於二十四日由西峰鎮出蒲河川
二十五日會楊世俊陳義之師於鎮原合追至孟壩寺
截殺尾賊數百名復追及前隊於三汭河賊護其家口
輜重先行而以悍騎數百扼險抗拒各軍馬隊逕前衝
橫步隊從旁排列而進鎗矛迭施賊不能支四散奔竄
拋棄騾馬輜重填塞道途落後之賊悉被斬獲官軍蹣
追八十餘里至白馬舖斬賊千計二十六日追至洪河
川賊去已遠軍中裹糧將罄遂亦收隊回蕭金鎮二十

九三十等日各軍以次均回原防統計是役殺斃饑斃之賊及墜崖而死者寔不止二三萬人驟馬之倒斃餓斃及被各軍奪獲者約二萬餘匹拔出難民萬餘拾獲軍械無數慶涇各屬一律肅清竊維董志原地居秦隴要脅本唐之涇原宋之環慶故地昔時設立重鎮以精兵宿將駐之藉以控制遐荒撫綏雜虜形勢之重自古已然陝回竊踞以來遠近城邑寨堡慘遭殺掠民靡孑遺平慶涇固之間千里荒蕪彌望白骨黃茅炊烟斷絕被禍之慘寔爲天下所無此次乘其竄動急追猛剿積

年蠲穴搜蕩一空賊之精騎悍黨銷亡殆半機局本有
可乘惟師行所至井邑俱荒水涸草枯賊因此而多所
喪亡官軍亦因此而艱於追逐又其時適值內變紛乘
北路官軍因內顧不遑未克橫衝側擊其赴師期一收
聚殲之效是則臣等所耿耿不能自釋者也現詗該逆
由環縣固原南路竄至下馬關復由下馬關分竄銷河
城祿望城半角城金積堡一帶賊情渙散不但陝回與
甘回因剽掠而肇衅生端卽陝回之向分東彌西彌者
亦因喪敗而各懷怨恨陝甘回患庶有止息之期此時

所最急者宜乘時耕墾擇要興屯以活遺黎而弭飢寒之道以儲軍食而銷譁變之萌庶內政既修軍民漸有固志乃可徐圖進取斷不宜苟目前旦夕之效求速反遲又蹈從前覆轍也其目前兵事所宜急籌者如駐軍董志原扼秦隴兩省關鍵駐軍秦州通蘭州一綫餉道駐軍正甯甯州之間爲進慶陽之謀駐軍涇州爲通平固之漸皆主固秦以規隴自東徂西者形勢之自然由近及遠者行軍之次第既不敢濡滯而坐失機宜亦不敢造次而貽譏壯往一切規畫皆於無可設法中竭蹶

圖之事同創始艱阻萬狀臣等惟有虛衷商榷殫誠盡
瘁以求下紓民難上慰

慈懷其在濟與否則固未能逆計也至此次各軍將士
徑擄積年老集轉戰數百里不遺餘力洵屬著有微勞
應請先予獎敘以酬勞勩因原提督直勇巴圖魯雷正
綰記名提督浙江處州鎮總兵輔勇巴圖魯馬德順均
請

賞換清字勇號二品頂戴按察使司銜新授陝安道呼
敦巴圖魯黃鼎請

飭交軍機處存記遇有按察使缺出請

旨簡放二品頂戴陝西補用道李耀南前因江蘇六塘河疏防一案奉

旨拔去花翎計銷勇號嗣經

臣宗棠

奏調該員辦理營務深知奮勉此次督軍追剿異常出力應請

旨賞還花翎記名提督頭品頂戴裴凌阿巴圖魯楊世俊記名提督愛星阿巴圖魯張會元均請遇有提督缺出開列在前請

旨簡放提督銜陝甘補用總兵博勇巴圖魯開定邦總
兵陳義均請以提督記名請

旨簡放提督銜記名總兵毅勇巴圖魯高登王陝甘補
用總兵裴思朝均請遇有總兵缺出請

旨簡放提督銜補用總兵撫勇巴圖魯黃有忠請仍以總
兵記名遇有總兵缺出請

旨簡放記名提督尚勇巴圖魯張仲春記名簡放總兵
譚正明均請

旨交部從優議敘總兵銜補用副將殷華廷彭壽山兩

湖補用副將馬德中補用副將政勇巴圖魯張得志均
請以總兵升用閩浙補用副將王有慶儘先補用副將
銳勇巴圖魯李洪春補用副將秦龍瑞均請

賞加總兵銜副將銜浙江補用參將周炳榮請以副將
仍留浙儘先補用副將銜補用參將讓勇巴圖魯陳全
凱副將銜留陝補用參將羅青山副將銜儘先參將陝
西河州鎮標右營遊擊郭萬春均請以副將留於陝甘
儘先補用閩浙補用參將廖三元請

賞加副將銜儘先游擊王得洲請以參將補用並

黃加副將銜恭將銜儘先游擊李廣珠請以參將補用
藍翎游擊銜儘先都司趙連科請以游擊補用並
賞換花翎其餘出力弁勇等可否准臣等擇尤彙併一
案保獎以昭激勸之處出自

天恩所有官軍追剿逆回連獲大勝蕩平董志原賊巢
詳細情形並現籌布置大概謹合詞馳

奏伏乞

皇太后

皇上聖鑒訓示施行再此摺係由臣宗棠主稿合併聲

明謹

奏 同治八年四月初一日

同治八年四月初七日内閣奉

上諭左宗棠等奏官軍追剿逆回連獲大勝蕩平董志
原老巢慶涇名屬一律肅清一摺甘肅慶陽所屬之董
志原地居險要久爲回逆盤踞該逆探知官軍進剿糾
黨千餘騎扼三不通地方憑險抗拒道員黃鼎等分路
前進於五鼓秣馬蓐食行至邱家寨該逆卽排隊力拒
鎗砲如雨官軍往來衝突步軍繞出賊後賊眾不支紛

紛敗遁我軍追殺百里當將董志原鎮等處賊巢踏毀
次口各軍由董志原追剿黨家腰線山徑逼仄該逆阻
隘死拒官軍奮勇衝殺立斃悍賊十餘名逆首撥馬先
逃餘賊均敗竄官軍追殺五十餘里收復慶陽府城其
雷正綰等軍追剿三汊河斬賊千計復追至洪河川始
行收隊計是役逆回殺斃饑斃及墜死者二三萬名奪
獲騾馬二萬餘匹救出難民拾獲軍械無算慶涇各屬
一律肅清剿辦尙屬奮勉所有尤爲出力之提督雷正
綰著賞換達春巴圖魯名號總兵馬德順著賞換博啟

巴圖魯名號道員黃鼎著交軍機處存記錄用李耀南
著賞還花翎提督楊世俊等均著遇有提督缺出開列
在前請旨簡放總兵圖定邦等均著以提督記名請旨
簡放高登玉等均著遇有總兵缺出請旨簡放員有忠
著仍以總兵記名遇有總兵缺出請旨簡放提督張仲
春等均著交部從優議敘副將殷華廷等均著以總兵
升用王有慶等均著賞加總兵銜參將周炳榮著以副
將仍留浙江儘先補用陳金凱等均著以副將留於陝
甘儘先補用廖三元著賞加副將銜游擊王得洲著以

參將補用並賞加副將銜李廣珠著以參將補用都司
趙連科著以游擊補用並賞換花翎其餘出力員弁勇
丁著左宗棠等查明彙案奏請獎敘毋許冒濫該部知
道欽此

軍機大臣 字寄同治八年四月初七日奉

上諭左宗棠等奏官軍克復董志原回巢慶涇各屬一
律肅清現籌布置情形一摺已明降諭旨宣示並將出
力之提督雷正綰等照所請獎勵矣董志原地居秦隴
要膺久爲回逆老巢經官軍此次痛剿克復慶涇各屬

一律肅清該逆由環縣固原兩路北竄下馬關等處左宗棠等因裏糧將罄仍令各軍回駐原防擬擇要興屯徐圖進取固屬老成持重第當此得勝之餘軍威大振回情渙散甘肅各匪經此懲創自必大爲震懾若能乘勝進剿必當事半功倍倘遲遲進取恐回逆結謀抗拒轉形費力著左宗棠將糧餉等事與劉典妥商後卽行西征隴回並馳至涇州接受總督關防擇要駐紮居中調度以期秦隴兩省得以兼顧至延安一帶地方是否安謐扈彰有無反側董福祥是否歸降興辦兵屯應如

何經畫左宗棠籌定後即可交劉典經理免致失此機會穆圖善於左宗棠未到甘肅以前仍當將金積堡等處鼠回盡力堵剿毋令跌出邊外勢成蔓延左宗棠另摺奏查明劉松山及高連陞兩軍變亂情形均已明降諭旨將劉松山等分別議處革留及副將楊玉魁等正法遇害之總兵黃毓馥等議卹矣其未獲之蔣宏高石文科仍著左宗棠等隨時嚴拏毋任漏網現在高連陞所部陣斬及擒獲正法者人數甚多未變各營改派李輝武等統帶尙屬妥協著卽飭該統領等妥爲鈴束不

可稍涉大意致生事端將此由六百里各諭令知之欽
此

劉松山剿除綏德叛卒收復州城摺

奏爲劉松山剿除綏德州叛卒州城收復謹據實馳陳
仰祈

聖鑒事竊廣東提督劉松山率師由山西永甯州渡河
而西設採買糧局於永定州之軍渡留所部中軍三五
兩旗及記名提督蕭章開所部右軍後旗勇夫轉軍渡
之糧於綏德北掃蕩而西距綏德又遠又留記名提督
易德麟所部前軍後旗記名提督蘇松鎮總兵章台才
所部左軍左旗駐綏德轉綏德之糧於周家嶺一帶比

抵鎮靖堡復稟糧西則靖邊土匪定邊回匪又飭易德麟率所部前左右三旗駐五寶堡轉周家嶺一帶之糧於鎮靖堡以餉前敵各軍兼哺隨眾計自軍渡糧局渡河經綏德州周家嶺五寶堡以抵鎮靖堡山程往返其一千零八十里各勇夫散布各處絡繹載塗其駐綏德者時需輪舫遞運分統之員僅章合才往還監護巡視不常厥肩以故游匪竄隨其間潛相勾煽無從察禁此變之所由生也二月十三日游勇勾結綏德州城內外各營起事與臨州城當變出者率時風謠所播人心震

駭傳聞異詞不特劉厚基金順據城中逃出土民傳說訛誤頗多卽臣等所據何作霖軍渡來稟及成定康陳瑞芝等所稟情形亦均係游匪叛卒踞城以後謠傳其於游匪叛卒姓名及被脅弁丁固未能指實也茲據劉松山稟二月十七日在洛珠川行營接章合才急報十三日午後由義合鎮糧局察收糧石回州中途突聞游匪滋事州城已被襲踞城內外存營弁勇或被其勾結入夥或被脅入城或乘間逃走其挑糧未歸之弁勇押糧未歸之營哨各官又皆未帶軍械無以制賊東路則

折向宋家川西路則竄赴周家嶺形勢倉皇失所依據
劉松山得報卽並蕭章開所部由洛川折由瓦窰堡南
趨飭易德麟帶所部會師清澗沿途偵知營務處提督
黃萬友帶所部中軍第六旗聞變時已交總哨帶赴瓦
窰堡而何作霖又已將三五兩旗調過東岸知叛卒零
星湊集不能抗拒大軍也二十二日馳抵瓦窰堡派提
督曹義勝赴綏德察各軍反狀三十日抵清澗章合
才率馬隊三營來會二十四日曹義勝自綏德州飛馬
來報城中各營不知統將動靜人心惶惶曹義勝至密

告已抵清澗則大喜二十三夜四更乘各遊匪酣卧殺斃百餘名叛卒二十餘名弁勇之被脅者遂乘勢反正縛哥老會首謝永青唐太春方經山胡泰江童嘉隆等五犯解清澗行營成定康所部之在城內者亦隨之俱行二十五日到清澗劉松山提訊謝永青唐太春據供前在湖北軍營當結拜哥老會匪陸續來至綏德勾煽城內外各營勇丁甫數百人不料被新夥暗算遂致破案訊畢斬之各營哨官什長指出叛卒一百二十七名供認不諱概予斬決在營各哨官參將銜補用遊擊羅

忠桂湯惠能補用遊擊王福升補用都司黃忠貴察訊
情節較重一併軍前正法劉厚基於二十五日由米脂
帶隊馳抵綏德與署綏德州知州陳瑞芝收復城池二
十六日進至石嘴驛摻獲逸匪吳得勝楊占魁斬之聞
事平仍回米脂郭寶昌行至延川聞事平亦引軍還自
會匪勾煽叛卒起事迄事平甫閱旬日首逆悉數縛誅
大局敕定始時流言四起人心震駭至此而後怙然哥
老會匪爲害之烈如梟虍之恐驚鬼蜮之不易防亦可
概見矣臣等現仍嚴飭成定康陳瑞芝劉厚基等察緝

游勇會匪務期淨絕以遏亂萌一面咨令劉松山乘軍情安謐之後逐一清釐整頓曉之以名義忱之以禍福俾克永保終譽以承

恩寵至綏德軍變與高連陞軍變事起同時論者疑其或有交通情弊則固不然無論綏德去宜君千餘里山谷阻隔聲息難通且高連陞所部名雖楚軍實則剿平廣西江西閩浙粵東髮逆所收降人居多其隸川黔者尤多哥老會益哥老會者本川黔舊有嚙嚙匪之別名也昨訊決之首逆丁玉龍朱得達李長林羅興萬要逆

黃上輔等皆籍隸貴州四川首逆鄔洪勝熊定邦皆籍隸江西與綏德首要各逆出自湖廣河南者有別雖同一哥老會匪而氣類攸分也劉松山治軍紀律嚴明恩信素著故弁丁聞其還旆清淵卽倒戈相迎而劉松山以此憤積於中義形於色上書臣宗棠懇求奏請從重治罪臣等未敢壅於

上聞應否寬免之處出自

鴻慈逾格臣等未敢妄擬此案失察之咎該軍分統及營官哨長均有難辭前署綏德州知州成定康現署綏

德州知州陳瑞芝亦有應得之咎容俟察核明確分別
辦理惟綏德宣君兩逆案情罪實有不同宜君楊店之
變因拏辦哥老會匪迫而爲亂竟敢謀通回逆撓亂大
局戕害主將營官及差官幕友多人攻犯城池情非重
大無以加之綏德則未嘗戕害所管將弁未嘗勾通外
寇衅端實由游匪勾煽而起倡首正犯固罪無可逃被
脅各卒情似可恕臣等愚昧之見未知當否謹據實馳
陳伏乞

皇太后

皇上聖鑒訓示施行再此摺出
臣宗棠主稿合併聲明
謹

奏
同治八年四月初一日

同治八年四月初七日內閣奉

上諭左宗棠劉典奏剿除綏德州叛卒州城收復一摺
本年二月間陝西綏德州營勇突被游匪勾結叛踞州
城經提督劉松山率蕭章開等會合總兵章合才所部
由瓦窰堡馳抵清澗殺斃游匪百餘名叛卒二十餘名
被脅弁勇乘勢反正縛匪首謝永青唐太春訛係自湖

北勾結會匪陸續至綏德煽亂當飭處斬其指出叛卒
一百二十七名及叛將羅忠貴湯惠能王福升黃忠貴
一併正法收復綏德州城池搜獲逸匪吳得勝楊占魁
斬之軍情大定此案劉松山有統率將弁之責不能先
事防範卽予從重治罪亦屬咎有應得姑念該提督平
日打仗尙屬奮勉加恩免其治罪著交部議處前署綏
德州知州成定康現署綏德州知州陳瑞芝亦有應得
之咎均著革職留任失察之營官哨長著左宗棠等查
明分別參處此次綏德勇變除倡首之犯務獲正法毋

許一名漏網外其餘被脅反正弁勇概免追究以示區
別該部知道欽此

審明戕害高連陞叛逆擬辦完結並收輯成營摺
奏爲審明戕害高連陞全案叛逆擬辦完結並收輯成
營恭摺馳陳仰祈

聖鑒事竊甘肅提督高連陞軍變被戕經_臣等於三月

初一日馳報維時首逆丁玉龍鄔宏勝朱得達等尙未
捕獲_臣等嚴飭各營分途躡緝務期罪人斯得以申

國法而快人心旋據前路左營總兵陳光明代理洛川
縣知縣喻長銘馳報二月二十六日盤獲首逆鄔宏勝
初猶詐稱吳得勝經同時獲案之馬夫陳茂生當面質

認確是二月二十夜倡亂手戕高連陞之鄔宏勝據提督丁賢發報在耀州陸續捕獲首逆朱得達黃上輔及逆黨熊松宜焦得興田勣發唐占額羅有元楊長福楊廣舒等七犯預知逆謀之鄧占武等十一犯當經檻送臣典三原行營臣典提訊各犯立即正法以朱得達黃上輔情節尤重飭解下宗棠乾州行營彙案審辦三月初六日據陝西提督雷正綰提督周蘭亭報稱三月初二日首逆丁玉龍熊定邦羅興萬李長林及逆黨吳得勝卽吳步雲等百餘人竄至長武之密店雷正綰周蘭

亭分途截擊立將丁玉龍等悉收擒獲起解臣宗棠於
三月初七十六等日各犯解到時親提研鞫首逆丁玉
龍鄔宏勝認係哥老會匪頭目倡首謀變戕害統將不
諱比設高連陞黃毓榘賀茂林及同時遇害各員弁之
靈臣宗棠親手加刃飭將該五犯磔誅刳心致祭叛弁
黃上輔羅興萬吳步雲卽吳麻子叛卒汪宏發黃玉春
王德明夏邱保寇得有李正魁秦真隆唐玉林武一太
鄧世發王洪林胡得勝李正魁卽李連四黃升泰鄭世
祿李洪順劉苟義王炳五趙長興陳國樹吳秀山朱洪

標張洪興汪裕祿曠謙居湯得勝尙五彪單整祿王小
宗錢萬洪朱定貴譚裕勝升順正何得興譚得勝辛得
勝雷開太鄧戴文梁占魁吳奎壽朱應林何樹元李二
科王仁和張德勝滕加貴楊月盛王運強何正顯李永
德李飛龍郭起財李玉成王玉貴唐士甲何銀連蔣明
桂胡正安江大興朱玉貴蕭興順蔣洪元阮得元魏恒
有羅奉深李得勝羅文德陳元慶游發桂蘇占彪七十
三犯訊皆同預逆謀到楊店攻同官縣城古泉營壘經
官軍擊散折由馬欄鎮出山河鎮擬投回巢適聞回巢

已傾折而趨長武密店始就擒者訊畢概與斬梟據知
府劉倬雲總兵張福齊報捕獲叛卒蔡鳳耕杜金德張
志元吳桑富張從義王得勝吳得勝楊泰勝潘洪勝王
良喜李春喜張永清等犯提督丁賢發於所收就撫各
營中先後察獲叛卒王永芳任勝喜史子義卽史金臣
等犯亦皆軍前斬決梟示統計高連陞一軍叛弁勇丁
除陣斬千三百餘名外捕獲訊決者計一百八十餘名
首要各逆除蔣宏高石文科尙未獲訊未知曾否伏誅
外餘俱按名捕獲訊結其未變之後營及前營三哨已

飭改歸署漢中鎮總兵李輝武統帶丁賢發桂錫楨等
所收被脅之勇丁一千五百餘名分爲三營以兩營歸
丁賢發統帶以一營歸記名道魏光燾統帶提督周紹
廉總兵張福齊所收被脅勇丁六百餘名除補缺額外
各編列隊伍安插所部各營中而事已大定所有同時
遇害之提督銜湖南補用總兵黃毓馥總兵銜補用副
將賀茂林花翎同知銜浙江補用知縣謝生春四川補
用副將高英舉守備吳學裕千總余永福把總朱云發
從九潘甫一從九張西堂監生方甫臣倉猝遇變遭禍

最慘應總

天恩飭部照原階原資議卹

卹典並請

旨准其附祀高連陞專祠以慰忠魂查異變之起由於
左營該營官總兵銜副將楊玉魁駐營米子窰距高連
陞楊店老營三十里高連陞查拏會匪丁玉龍丁玉龍
跳匿該營遂約該營差弁邱宏勝哨長熊定邦朱得達
大旗李長林黃上輔遽起爲變竄夜闖入楊店老營戕
害統將據該營官供二月二十夜叛卒出營時曾向其

截阻被傷驗明傷痕屬實訊之首逆鄔宏勝所供亦同
然首逆皆出自該營丁五龍又匿避該營糾約起事該
營官縱不預知逆謀究亦無所逃罪總兵銜副將鄧玉
魁駐營宜君縣城於哨長蔣宏高郭見寅李廣全結拜
哥老會時漫無覺察與楊玉魁均被叛卒劫赴楊店大
營回攻同官縣城經官軍剿敗後始同楊玉魁投營自
首厥罪維均管帶中營四哨總哨官補用總兵唐畢賢
駐營楊店二十夜之變該總兵不但未能力遏兇鋒救
援統將且所管三哨一時均變隨同攻撲同官縣城事

敗投_臣劉典行營吳訴憂憤訛據生擒叛卒供稱該總兵亦是會內番長是該總兵因迷惑既深意存觀望可知楊玉魁鄧玉魁唐畢賢情罪重大現均押解乾州監禁應請

旨一併立正典刑以彰

國法總兵銜副將周廷興駐營古泉二十夜五更丁玉龍鄒宏勝率叛勇至古泉脅該營同變該營通逆之弁勇起而內應周廷興立刃數賊忽大股叛勇蜂擁而入周廷興立與格鬪右手右耳左膊右腿均受刀矛重傷

名叛卒誤謂已斃委之而去所部弁勇俟叛卒既去乃
昇置山谷垂絕始蘇赴耀州具稟現因傷重未痊尙留
耀州醫治管帶副後營留甘補用道楊銘濬駐管金鎖
關距揚店老營七十餘里二十一日聞變帶所部過同
官邀桂錫楨赴援甫行訥知叛卒來撲卽與桂錫楨商
同守城兼保糧局因招本營上城致叛卒矛傷左足楊
銘濬手刃登城叛卒危城全保亦與有力周廷興楊銘
濬兩員於此案情節最輕平日素稱謹樸應否請
旨暫行革職仍留營差遣俾昭平允之處伏候

聖裁所有擬辦此案各情謹合詞據實馳陳伏乞

皇太后

皇上聖鑒訓示施行謹

奏

同治八年四月初二日

同治八年四月初七日內閣奉

上諭前因甘肅提督高連陞軍變被害迭諭左宗棠等
詳查究辦茲據該大臣等奏將全案各情審明具奏此
案副將鄧玉魁駐營宜君縣城於哨長蔣宏高等結拜
哥老會時既無覺察復與副將楊玉魁均被叛卒劫赴

大營回攻同官迨經官軍剿敗始同楊王魁投營自首
補用總兵唐舉賢駐營楊店所轄三哨一時同變事前
不能救援統將事敗始投劉吳軍營並據叛卒所供亦
係會內香長現均經還欵訊明押解乾州監禁該犯等
情罪重大未便稍事稽誅鄧玉魁楊玉魁唐舉賢均著
卽行正法以伸國憲副將周廷典道員楊銘濬未能力
挫兇鋒本有應得之咎惟或因格鬪受傷或因守城出
力情節尙屬可原周廷典與楊銘濬著暫行革職仍留營
差遣至所稱同時遇害之提督銜湖南總兵黃毓馥總

旨依議欽此等因臣伏念甘捐道府州縣五項官階既經戶部奏奉

諭旨一律扣至同治八年四月十六日卽行停收自應照辦惟臣軍餉項萬分奇絀現值進剿尤虞缺乏查甘局收捐專以寶銀上兌本較他局捐數稍昂所以臣上年奏請將部定不准外捐之道道府州縣各項專歸該局辦理以免避就今照部議一律停收則佐貳雜職捐數寥寥且斷難期踴躍有虛名而無實濟於軍餉毫無裨益況御史周恒祺奏請停捐道府州縣部議隨時體察

庫款情形奏明辦理京外本屬一體可否懇

恩准將甘局收捐之道府州縣無論省局分局均展至
同治九年四月十六日再行停止以裨餉糈而支危局
之處出自

聖裁除陝西捐局由撫臣劉典奏請展限外謹附片馳
陳伏乞

聖鑒施行謹

奏

同治八年四月初一日

軍機大臣奉

旨著照所請該部知道欽此

恪靖奏稿續編卷二十二目錄

陝境肅清進駐涇州督辦甘肅軍務摺

請飭各省力籌協餉摺

甘餉窘迫情形片

遵 旨覆陳摺

遴員署理府州縣辦理賑務撫輯事宜摺

甘肅臬司張岳齡開缺片

黃鼎攻克安家山寨片

陝省報捐各生捐冊由西征糧臺咨部片

劉厚基稟報軍情不實請旨懲處片

陝境肅清進駐涇州督辦甘肅軍務摺

奏爲官軍搜剿各匪疊獲勝仗陝境地方一律肅清
謹遵

諭旨由邠州長武進駐涇州督辦甘肅軍務仰乞

聖鑒事竊董志原回巢掃平綏德宜君叛軍同時綏定
後陝西北路降人董福祥李雙良張萬會扈良儒梁植
劉文誥劉永春等股眾經署綏德州知州陳瑞芝會同
劉松山委員提督黃萬安等安插於瓦窰堡老君殿周
家嶺等處耕墾荒地均就安帖維綏德延安交界各縣

時有游匪積卒土匪暗相勾結假息山谷間肆行劫掠其近延長延川宜川者記名提督安徽壽春鎮總兵郭寶昌記名提督劉彝集疊次派隊擒斬各數百名其近洛川者副將劉竹田時出隊截捕多所斬馘其叛軍畏誅漏逸及變易姓名潛跡營中者又經劉松山記名提督周紹濂先後搜緝正法於是北山迤北縱橫數百里間漸有寧宇而鄜州甘泉西北一帶游匪數十數百繼忽出沒動輒數十百里莫測其栖泊之所臣於董志原回巢掃平後檄留陝道員魏光燾提督劉瑞冕兩軍由

黑水寨王家角進太白鎮合水縣一帶以漸向慶陽正
運糧待發間忽捕獲蓄髮悍賊張有福等五名訊洪爲
首者賊卽上年盤踞雲巖鎮巨逆袁大魁自上年六月
雲巖老巢經官軍攻破後袁大魁乘雨夜竄逸隨身死
黨數十人七月內竄至宜川縣燕曲堡招集敗黨及甘
肅饑民潰卒約共數百人復經官軍擊敗袁大魁仍偕
其死黨竄出冬間逃至保安縣屬之老巖窰其地絕險
有居民百餘戶憑險結寨自保回土各匪頻年攻之未
破袁大魁僞爲官軍糴糧者給寨民遂入據之糾集游

匪潰卒約數百遍脅鄰寨士民千餘皆蓄髮從賊分爲五隊每隊一僞將軍一指揮統之瞰官軍進止爲趨避俟忽狎至官軍不能得其蹤跡也魏光燾既訊畢斬張有福而釋其餘黨令爲前導一面會商提督劉端冕副將張星元刑部主事周瑞松各派所部助勦期速蕝事庶移營前進可免後顧之憂四月初五日潛師夜起黎明抵老巖密前面三十里馬蹄溝守卡賊驚起抗拒副將王正和蕭玉元遊擊李奪魁參將魏紀登奮威衝殺立斬執旗賊目數名奪隘而入適總兵于奇泮副將石

茂林總兵周振南參將譚吉士左右截出將馬蹄溝賊登時擒斬殆盡其踞頭道川之賊聞風驚卻官軍合勢蹙之窮追二十里斃賊約共四百餘名奪騾馬百餘頭生擒僞將軍徐榮韓清榮僞指揮張洪太余天貴等訊畢斬之時已薄暮大雨如注始令收隊初六日黎明劉端冕所部提督甘大有副將喻經魁率師抵陳家紙坊遇賊百餘殲之進逼鷓子川守卡賊分布拒守鎗子如雨參將章和榮顏禧承等斬關而入賊大譁潰官軍分頭截擊生擒僞指揮張復盛何文彪等逆訊明斬於陣

前士氣倍奮當將鶴子川之賊數百一併擒斬初七日駐守延安之副將賀卓吾幫統之副將張星元又率所部馳來魏光燾會集諸營分路直逼老巖寨方擬兵力厚集乘勝而前縱賊巢天險亦無難一攻卽下也派州判方大鸞督前後營及前營馬隊以老巖寨之前自率中營奇營及中營馬隊繞出老巖寨之後各營築壘環攻竟日將士屢前屢卻苦於無力可施收隊後審視賊巢見老巖壁立千仞下臨洛水窰孤懸巖中左右立木爲柵兩旁皆深塹小橋橫架僅通人行爲賊出入之路

賊早將巨繩曳橋令起路已斷矣審前石磴螺旋近浴處水樓兀立賊踞其上層開鎗眼是爲審之外郭議先將水樓攻燬以漸逼審外初九日令賀卓吾張星元率所部攻水樓之賊而自率各營從審外兩旁夾擊力攻竟日外審雖破斃賊不過數十而壯士之傷亡者已十餘名參將袁海壽手受子傷審內礮石紛下帶傷者益眾俯視水樓已經著火旋被賊撲熄收隊而回諸軍均擬速平賊巢以便及時前進舉辦屯墾諸務見賊踞巖穴極險無路可攻欲罷不能欲速不可慙憤交並連日

會商巖旁巖下均無可著手非從巖頂鑿石立柱潛縱壯士引繩而下無由得抵洞門也魏光燾急雇石工而挑勇丁之習此藝者助之一面會各營逐日更番撲卡多積蒿草枯柴僞爲火攻之狀疑之十五日巖上石路成穴石多安橫柱下令軍中能從巖縱下撲洞門者受上賞自十五日起派隊輪攻鎗礮晝夜不絕時放噴筒火箭令賊防範不得休息五鼓撤隊十七日方鳴金收隊昧爽壯士十餘由巖巔抱皮繩縱至棚外賊猶酣臥少頃縱下者益多拔棚闖入連拋火彈袁大魁急喊悍

黨迎拒密內人聲沸起官軍短兵撞刺賊屍枕藉袁大
魁經官軍又傷倒地賊弟袁二亦刃傷未殊時都司涂
國榮守備楊振家陳如美千總范潮海董大榮蔣得勝
戴鵬程外委張金明徐有禮軍功李洪泰周元吉劉開
年陳萬得一齊殺入割取袁大魁袁二首級大呼以徇
各軍競奮立將上下卡水樓一併攻拔老巖十五窰之
賊除斬馘外紛紛墮巖墮水以死無一免者官軍將洞
窰一律剷除免爲山寇竊踞乃次第拔營前進函袁大
魁首級馳送大營驗明遍傳被害各地方示眾而鄺延

巨患以平周瑞松既會克老巖竊賊巢收隊回延安調知府城南三十里野豬窪等處時有遊勇出沒商旅苦之而未悉其巢穴所在正擬派隊搜捕間二十四日捕獲遊勇朱俊林訊知匪目杜占元自上年臘月勾結土匪連破英溝龍耳溝魯家灣等寨卽踞魯家屯收留遊勇哥老會匪分布韓家原紙坊村孫家溝不時遠出數十里百餘里外肆行劫殺所得贓物輒以少許分結近寨民人故伏匿雖久迄無舉發者二十六日黎明周瑞松率所部抵魯家屯察看寨踞山巔小徑已經掘斷兵

不能入乃令副將賀卓吾帶同武舉彭春亭及親兵二
名持諭叩寨託言買糧杜占元不疑放板橋納之賀卓
吾過橋以親兵守護橋頭急放號礮周瑞松麾軍奪隘
而入武舉彭春亭手縛杜占元霎時隊伍齊至搜殺遊
匪殆盡墜巖死者二十餘人同時副將張維美參將彭
芝蘭亦將紙坊村盤龍寨韓家原各處遊匪一律搜捕
並獲土匪劉大福斬之周瑞松將所獲牲畜貨糧俵給
貧民親訊匪目杜占元張光如李鳳先張兆霖吳東元
張世顯楊林元朱洪勝等均積年哥老會匪一併斬決

而郭寶昌前次勦散狗頭山賊後賊目張大仁卽張三
胖子復勾結遊勇土匪於延長縣東南八十餘里界連
宜川之小海村南莊羊肚原等處時出剽掠四月十四
日擾及城東七十里之白家河知縣孫永成偵悉賊蹤
商請郭寶昌所部記名提督宋朝如副將李長勝分路
前往圍捕甫抵王家河遇掠食之賊二百餘官軍奮擊
斃賊多名生擒李根兒等十餘名白家河之賊卽解圍
潛遁宋朝如收隊後賊仍折回攻撲白河十七夜宋朝
如孫永成復督兵圍擊之斃賊百餘名賊敗歸巢十八

夜官軍襲破馮家嶺南莊羊肚原諸巢陣斬匪目呂邦
科斃賊數百名生擒王守正李金賢等四十餘名分別
斬釋惟張大仁由深淵遁去二十八日竄至鄜州東北
牛武鎮僅殘匪百餘名駐鄜官軍急起遮截擒斬二十
餘名餘皆散逸無蹤總計榆林綏德延安鄜州各府州
所屬遊匪潰卒土匪巢穴剗削一空潦盡潭清數郡殘
黎得安耕作臣軍得以一意西征免虞牽掣以局勢言
之雖較之前此度隴諸軍獲效稍遲將來蕝事或速未
可知也綏延之間安撫漸有成局北路劉松山一軍由

西北進指定邊花馬池一帶以截甯靈之賊令不得東
中路魏光燾劉端冕周紹濂諸軍西出合水正甯甯州
以向環慶雷正綰黃鼎諸軍由董志原涇州趨鎮原固
原崇信華亭以蔽汧隴而規平涼南路李燿南吳士邁
諸軍由隴州寶雞趨秦州臣率親兵及正營良營由永
壽邠州長武以赴涇州飭馬德順簡敬臨馬步各軍暫
駐上良百里鎮以策應南北兩路且耕且戰安民以除
土匪整軍以戢潰卒撫良回以勦逆回不敢以小謀近
功誤

國家安邊至計也所有陝西肅清臣軍度隴情形謹會
同西安將軍臣庫克吉泰署陝西巡撫臣劉典據實馳
陳兵老密巖之戰雖僅攻克一堅巢斬馘不過千餘然
將士縋幽鑿險晝夜環攻不遺餘力較之平原列隊決
勝負於旦夕之間者勞逸懸殊可否由臣擇尤酌保彙
入肅清案内從優請獎之處合併聲明伏懇

皇太后

皇上訓示施行謹

奏同治八年五月十九日

同治八年五月二十五日内閣奉

上諭左宗棠奏官軍搜捕各匪淨盡陝境肅清一摺陝西官軍自掃平董志原獍巢後各路匪徒仍復暗相勾結肆行劫掠經提督郭寶昌劉松山等派兵搜捕斬獲甚多雲巖鎮巨逆袁大魁竄至保安縣屬之老巖窩憑險結寨經道員魏光燾提督劉端冕等率兵攻剿殲斃逆首袁大魁及賊目多名餘匪悉數掃除各處匪類亦經官兵搜捕淨盡榆綏延鄜各屬一律肅清勘辦尙屬得手惟陝西頻年疊遭兵燹此時逆匪雖經剿淨而遊

勇士匪仍足以滋嘯聚且各屬地方賑撫窮黎安插人
眾在在均關緊要左宗棠現在振旅西征所有陝省善
後各事宜劉典責無旁貸卽著悉心籌畫妥爲經理以
期毋負委任欽此

請飭各省力籌協餉摺

奏爲各省協餉欠解過多臣軍西行愈形窘迫據實馳
陳仰祈

聖鑒事竊臣因餉事短絀屢次具摺馳陳前蒙

天恩諭各省除每年原協臣軍餉銀三百三十萬兩署

督臣穆圖善軍餉銀一百二十萬兩署撫臣劉典軍餉銀六十萬兩又添撥釐金三百萬兩總計八百一十萬兩欽仰我

皇上軫念於西陲民隱兵艱悉厯

聖慮各省如果遵

旨分起撥解則截長補短挹彼注茲臣自可一意馳驅
勉圖報稱更何敢再三曉瀆自取訾尤乃緘牘頻催並
經辦理西征糧臺翰林學士袁保恆再三商懇自同治
八年正月起截至四月底止計各省協餉共應解銀二

百三十萬兩除穆圖善委員提解不計外其解到西征糧臺及起解在途者各省就近對撥者止七十餘萬兩是各省撥解之數不及奉

旨協撥三分之一而舊欠協餉洋稅尤勿論也臣與劉典楚軍積欠已多無計彌補所藉以支持至今尙未譁潰者於餉銀解到時先儘購運糧食草料軍裝軍火軍械之需每月每營僅給鹽菜柴薪銀六七百兩俾勇丁長夫聊資餬口至疾病之藥餌傷亡之卹養與夫統領營哨官弁之薪水辦公銀兩槩停不發以故將領雖極

署乏而士卒尙免飢疲自董志原蕩平後官軍以次移營前進就近墾荒布種日事田疇招輯流亡計口放賑製備農器分購籽種及時誕降以業遺黎移粟移民以實曠土所需經費無款可指不得不於正餉內通融挹注將士知軍民均以謀食爲急怨讟不生五月節前各軍雖僅求一月足餉迄不可得歎息而返而臣前擬遣赴秦州一路官軍則因急籌一月足餉裹帶啟行以便隨地購糧尙未能湊發足數其他可知此餉事艱難兵事因而遲鈍之明驗蓋秦隴用兵籌糧艱於籌餉籌轉

運又難於籌糧古今不易之局而採糧轉運兩者尤非
實餉到手無從籌辦雖有良將不能點鐵而成金雖有
神兵不能煮砂以當粥迨軍士因飢致潰伍籍空存搜
括民糧以爲食而民亡雖募遊手以充兵而兵廢卒至
戰不能戰守不能守楊岳斌之急赴隴西趣戰而潰穆
圖善之急保蘭垣竭蹶而危足爲前鑒事後思之勞師
數載爲時不爲不久每年費過百萬所耗不爲不多其
於秦隴大局非惟無益也臣奉

命出師豈敢逗留不進然不預將後路稍爲布置餉道

槩予疏通而貿然前行再蹈覆轍其必貽

朝廷異日之憂也決矣臣自量才智技能與閱事之久

無以加於楊岳斌穆圖善而責任之重時局之艱無以

異於楊岳斌穆圖善且楊岳斌穆圖善專顧隴疆臣則

主固秦以規隴楊岳斌穆圖善專顧隴餉臣則司分解

而統收事勢固有不同也甘肅欠餉之勇以百數十營

計臣圖善既知其不足用矣不卽裁併復奏調馬隊二

千奏請募蜀勇三千實則數已盈萬餉不能增營不能

減復又增營以耗餉臣到涇接受督篆兵餉兼籌豈能

置之不理如以空言塞責違

旨之罪將無所逃欲得實餉支銷又將安出各省協餉
自本年正月至四月已欠解一百四十餘萬兩此後師
行愈遠得餉愈艱索餉者又將紛至沓來憑何答付各
省見撥餉之數疑

朝廷之厚於陝甘甘肅見撥餉之數疑

朝廷之偏厚於陝而孰將實解協款暗增出款一爲檢
校平伏懇

天恩飭下各督撫臣各就所轄地方廣爲設措於遵

旨協撥西征陝甘各款儘釐稅一項實力湊解如釐項
無餘卽暫移那款補足先其所急務期按月如數解到
西征糧臺不得再有短缺俾得預爲布置速赴戎機大
局幸甚謹具實馳陳伏乞

皇太后

皇上聖鑒訓示施行謹

奏
同治八年五月十九日

甘餉窘迫情形片

再陝甘餉事窘迫萬狀勢難支持各督撫臣奉

諭協撥豈有坐視西事艱危不急思援手之理而所以
頻催周應者亦有由焉一日既協濟陝甘兵勇可不協
濟陝甘餉銀也以薄餉給勇丁令赴他省之援其於本
地可省安集之勞其於他省可居援勦之名

朝廷視之無畛域之見也將領德之無廢棄之嫌也一
舉數善何樂不爲上年安徽增軍赴河南河南撫臣非
之曾以語臣並舉以入

告矣現在張曜宋慶所部則又河南撫臣代募西征之
軍人數多而餉不足又資山西協之以餉山西既允協

張宋之餉不能復餉陝甘也是陝甘未得豫軍之助先失河南山西之協餉也安徽之援秦者初僅郭寶昌之軍馬步三千人耳去冬復加募四千人交郭寶昌帶來則七千人矣人數多而餉不足臣不得不分陝甘之餉代爲買糧辦轉運是陝甘不能得安徽之餉且須分餉協安徽之軍也山東藩司潘鼎新奉

旨赴陝甘所部人數卻已減至四千月餉尙需二萬數千兩潘鼎新乞假三月一面求山東兩江之餉而此四千人者則已每月虛糜二萬數千兩山東兩江如允餉

澄鼎新之軍則必減應協陝甘之餉也現復奉

旨令陳湜帶所部西來立功贖罪陳湜所部合九千餘人此項月餉亦在六萬兩內外若取之陝甘陝甘何從覓此巨款若取之山西山西既須籌陳湜之餉轉瞬冬防又須另籌防河之軍防河之餉恐亦力有未逮陝甘懇催該各省各省得以有詞該各省名爲協撥陝甘陝甘並無實濟此陝甘餉事之窮也臣愚竊謂用東南之財賦贍西北之甲兵本古今不易之局若責西北以兵事而復責之籌餉責東南以餉事而復責之籌兵則兩

勞而兩失之卽以時局言之陝西兵力先勦捻後討回
先徂秦後度隴雖拮据不遑實未嘗多藉客軍之助臣
亦未敢藉口兵力單薄求助各省陝甘所急者餉爲陝
謀者宜先集餉不在增兵各省之兵增則陝甘之餉絀
蓋各省旣以兵助陝甘必不肯再以餉資陝甘也竊謂
各省之軍已來陝者如張曜宋慶郭寶昌三大支本是
勁旅然約略計之每月已需餉十萬兩上下如令河南
仍照舊供宋張兩軍之餉另加以購糧轉運之費飭宋
張於現存馬步營數內挑汰歸併或萬人或七八千人

則餉愈足而軍愈精可收飽騰實效張曜宋慶必能放
膽前進所向有功河南雖不再協陝甘陝甘亦受其實
惠而山西又可騰出月協張宋之二萬兩以協陝甘不
致再有拖欠亦兩得之道也安徽照舊供郭寶昌之軍
令郭寶昌撤減營數共留馬步四五千仍留七千人月
餉爲該軍購糧轉運之費郭寶昌必能放膽前進所向
有功臣不必兼顧其採糧轉運之需併可得安徽月餉
二萬兩實濟而安徽仍無所損其尙未到陝之潘鼎新
一軍陳湜一軍每月亦需餉八萬餘兩如停撤潘鼎新

之軍而令山東兩江以應給潘鼎新之每月二萬數千兩加協陝甘則陝甘可增山東兩江月協二萬數千兩實餉而山東兩江仍無所損如停止陳湜一軍留防山西應撤遣者仍令撤遣則山西河防仍資熟手無須另籌防河之軍防河之餉並可得裁兵就餉之益而陝甘餉事亦無所損倘亦計之最便者歟一曰各省協餉厚於淮軍薄於楚軍也曾國藩率鄉人討賊名其軍曰湘軍臣自咸豐十年由湖南奉

詔襄辦曾國藩軍務所部將士多沅湘澧資之產名其

軍曰楚軍李鴻章自皖赴上海權蘇撫篆名其軍曰淮軍三軍營制大略相同而餉事則豐吝頓異蓋所處之腴瘠固不同也上年勦捻事畢楚軍西行所指爲餉軍之資者洋稅淮軍東下所指爲撤軍之資者釐金然楚軍所得不及淮軍三之一也曾國藩奏借浙江釐金十萬兩爲撤軍之資而浙江於一月內已解三十萬兩其應解陝甘及臣軍之餉月共七萬兩嗣奉

旨加協又五萬兩浙江乃先將舊協臣軍之二萬兩一項停止不解查浙江此項協餉卽臣前由浙赴閩粵奏

協臣軍之每月十四萬兩一款臣由粵東凱旋時奏請
一併停解而每月以五萬兩協陝甘嗣臣由閩浙調督
陝甘復奏提浙江應餉馬德順餉一萬輪船經費一萬
共二萬兩合成七萬兩較原提每月十四萬兩之數僅
及其半現在浙江卽遵

旨於應解七萬兩外加協五萬兩亦祇每月十二萬兩
尙非浙江所難浙江一省經入經出各款均臣從前於
全省肅清時所定規模大致猶能記憶較之江南雖不
足較之江西福建則有餘撫臣如肯實心籌解一如劉

坤一英桂之無分畛域則除已裁釐金外協撥並非無款陝甘不止受其口惠也江南除照舊應解劉松山六萬兩外僅協臣二萬劉典一萬穆圖善一萬共止十萬兩而其協淮軍則每月二十萬兩多寡懸殊以餉事言之楚軍籌措之難甚於淮軍楚軍需用之繁且急甚於淮軍奚啻十倍而浙江江南所以應楚軍淮軍者多寡緩急反是非臣所望於浙江江南亦大違朝廷以兵事責西北以餉事責東南之旨矣李鴻章上年

陛見時與臣晤語亟以陝甘餉事爲憂而自任代爲籌措臣深感之此時陝甘餉事迫矣若李鴻章肯以緩急多寡之說告浙江江南請其以大局爲念無分楚軍淮軍衷多益寡移緩就急則江浙不徒託空言陝甘可速叨其實濟固臣所深願亦未嘗非李鴻章之初心也凡此皆應協陝甘之各省有款未解者部臣恐尙未深探其底蘊可否仰懇

天恩飭下部臣詳加察閱分別催提以拯危疆之處出自

聖裁至西北餉源素絀本無可開之源然古今才臣籌餉贍軍每多取資鹽務就陝甘而論陝食河東之鹽甘食花馬池鹽池之鹽各有引地頻年回捻土匪肆擾陝甘通遭蹂躪花馬池鹽池之鹽因路梗不能暢行每鹽一斤須價百數十文甘之殘黎時苦淡食臣擬俟北路之兵進至花定卽當妥爲辦理其河東之鹽雖頗暢銷鹽價仍形昂貴西安市價每鹽一斤須錢七十餘文乾州市價更貴軍民苦之而河東場產不旺細掣時形短絀臣聞河東一道除每年正雜各款開銷浮費竟至一

百餘萬兩之多而應解甘餉五十二萬兩則積欠甚鉅
一任號呼敦促從無一次大批旺解者查河東鹽務本
係先課後引庫款現存五十餘萬兩縱不能全局通籌
隨時接濟亦豈可坐視飢軍待潰不展一籌乃該道則
必俟乙年而始開解甲綱之銀遞年積壓儼成定例殊
不可解前任道員楊寶臣廉倨有聲不曉事理現任道
員李慶翱鄙詐成性惟解鑽營宜乎山西之鹺務不能
振興甘肅之餉源日形涸絕也臣前在閩浙因鹽務敗
壞至極奏調道員吳大廷署福建鹽道變法疏銷積引

力除中飽通計一年徵獲銀六十餘萬兩而商民稱便
臣去閩後照章收課聞每年仍可四十餘萬兩足徵理
財在於用人有治人然後有治法古語匪虛河東鹺道
一缺若得廉能勤慎如吳大廷者委任而責其成功則
浮費必裁正課必裕效可逆睹而甘餉亦期其得濟矣
臣餉事苛紕焦灼萬分偶有思慮所及不得不瀝陳於
君父之前不自知其有當與否謹據實附
奏伏乞

聖鑒訓示施行謹

奏 同治八年五月十九日

遵 旨覆陳摺

奏爲遵

旨覆陳仰祈

聖鑒事竊臣於四月二十一日乾州營次欽奉

諭旨穆圖善奏陝回竄擾南路撤回駐紮各軍以保完
善請飭金順兼顧山陝西北邊界並餉需爲艱及出差
官弁被地方官殺斃多命各摺片覽奏均悉陝回竄擾
秦州等處勢極披猖雖經善山保等奮力衝擊立解秦

州之國而糧運不濟譁潰堪虞穆圖善現飭駐紮各軍
移紮鞏昌並於甯遠伏羌二縣要隘分營扼守合剿南
路股匪疏通運道尙係爲事勢所迫不得不斟酌緩急
處以權宜所請交部議處之處著加恩寬免陣亡之副
將余東旺著查明請卹左宗棠聞清水民團之變出示
曉諭許以請帑賑撫禁革差徭固係爲恤民起見見惟
穆圖善處餉源窮乏之地力爲其難左宗棠總當恪遵
疊次諭旨將各省解到餉銀均勻分撥不得以空言見
好於民致甘肅軍務辦理愈形棘手前已有旨令左宗

崇馳至涇州接受總督關防現在甘省南路軍情緊急
著卽懷遵前旨迅赴涇州接印任事視賊所向認真剿
辦毋稍延緩金順現已進規烏拉磴口未必卽能分兵
花定甯夏一帶防務穆圖善當隨時與金順咨商相機
布置穆圖善所派赴楚製辦軍裝之遊擊周欽輝等行
至榆林被該處地方官殺戮殆盡穆圖善以該道所稟
情節支離飭令切實根究一年有餘尙未稟覆顯有事
前枉殺事後粉飾情形著劉典提集人證嚴訊確情務
令水落石出毋稍瞻徇原摺著鈔給劉典閱看將此由

六百里各諭令知之欽此臣維陝回竄擾秦州事在上
年十二月其時陝回方遞稟求撫而分起肆擾如故臣
覺其詐罷撫議曾於正月十三日附片陳明欽奉

諭旨董志原回逆首鼠兩端現又求撫左宗棠恐其包
藏禍心未敢將就了事所見甚是卽其時也甘肅攻河
州各軍於上年十二月敗後自正月初十日起各軍節
節潰退復被逆回截斷糧道逕退至鞏昌秦州其時清
水縣因派捐軍糧激變鄉民數千擁入縣城殺差役騷
擾數人洩其怨毒仍跪知縣傅炳森馬前明其非叛旋

卽出城署鞏秦階道張瑞珍馳稟擬從嚴懲辦臣以直
省征軍糧食從無責令民間供辦之事而甘肅各軍則
竟習以爲常每營每日勒民間共給一千斤或八百斤
以清水一縣而論養總兵敖天印一營每日須捐糧一
千斤每年卽需三千餘萬斤視額徵丁糧奚止數倍甘
肅州縣地方素稱苦瘠百姓何以堪此聞敖天印情性
慘刻異常每徵比軍糧竟創造非刑以銀箝夾糧戶鼻
孔牽之以走必待展轉哀號勒繳足數而後釋去其勇
丁之騷擾萬狀又不待言清水之民不得已請逐其防

勇又因縣中差役騷擾助營爲虐鄉民不堪其毒始忍死出此其情亦大可哀矣臣批張端珍稟咎諸軍不能殺賊偏善擾民嚴飭張瑞珍從嚴懲辦之非出示清水宣布

朝廷德意卽引

特發帑項賑撫延綏難民一事爲徵以明官吏科派將卒橫暴固非

朝廷意也又慮愚民藉詞干犯限令解散靜聽察辦毋許自作不靖致底滅亡並無許其請帑賑撫之說甘肅

自河州諸軍節節潰退之後蘭州與鞏秦一帶處處梗阻諸軍潰退者雖藉詞疏通餉道然距賊甚遠遇賊卽潰能護餉到省與否臣未接據文報聞各省協餉轉運入甘中途壓擱者尙有三四十萬兩之多是此時穆圖善之餉因運道中梗而絀非關臣不分潤且各省解到臣軍餉項寥寥頻催不應臣軍積欠日深西征糧臺並無存款亦實無可分潤也用兵先顧餉道轉運必取多途一路有阻全軍俱困甘肅奏撤慶陽糧臺臣兩疏之者以此穆圖善不悟臣早慮餉道之必梗前疏擬急

籌發兵秦州者以此臣拜摺後卽由永壽州州長武至涇州一面咨會穆圖善派員賁送督篆祇便任事謹據實覆

奏伏乞

皇太后

皇上聖鑒訓示謹

奏洞治八年五月十九日

軍機大臣 字寄同治八年五月二十五日奉

上諭左宗棠奏陝境肅清馳赴涇州請飭各省力籌協

餉及甘餉窘迫情形並遵旨覆陳各摺片覽奏均悉陝西土回各匪疊經官軍剿辦全境肅清本日已明降諭旨宣示其老嚴窩出力員弁人等著准其擇尤彙案請獎董福祥倡亂多年現以窮蹙投誠難保不心懷反側左宗棠赴甘在即應如何妥爲安插無滋事端之處仍著悉心籌畫交劉典妥爲辦理所陳劉松山等軍分路前進馬德順等馬步各軍暫駐靈臺以策應南北兩路均合機宜卽著督飭諸軍整旅遡征迅圖掃蕩該大臣抵涇州後卽祇受督篆任事以一事權陝省征兵盡出

金順現赴烏拉磴口等處該大臣勢難兼顧北路著卽會同定安金順規度情形飭令宋慶張曜兩軍合力堵剿郭寶昌一軍向與劉松山合力剿賊均稱得力現在應否會合劉松山軍截剿甯靈之賊著左宗棠酌覈辦理該大臣奏稱宋慶張曜郭寶昌三軍各減營數則餉足而軍愈精所籌不爲無見其應否裁減之處卽著定安金順會商宋慶張曜妥籌辦法其郭寶昌營勇著左宗棠飭知該提督精爲遴選以收飽騰實效所有該三營餉需已諭知李鶴年英翰吳坤修照舊按月批解毋

稍遲延甘餉現值奇絀未便多容客軍所奏亦係實情
潘鼎新陳提兩軍已分飭李鴻章等分別遣撤並令該
員等於撤勇後各赴該大臣軍營聽候差遣至遊擊周
欽輝等被殺一案仍著會同劉典確切查明按律懲辦
各省欠解協餉本日已諭知戶部按照欠數分別奏催
其河東鹽道存款並李慶翱有無劣蹟已諭知鄭敦謹
查明據實具奏矣該大臣入甘後務將軍事吏治悉心
整頓以維大局邊外情形何似定安等務當懷遵前旨
督飭德昌等分投追擊以靖邊氛將此由六百里各諭

令知之欽此

遴員署理府州縣辦理賑墾撫輯事宜摺

奏爲遴員署理府州縣各缺辦理賑墾撫輯事宜恭摺
具

奏仰祈

聖鑒事竊甘肅慶陽涇州一帶地當秦隴之衝頻年回
逆竄擾人民流亡殆盡城野荒廢千里蕭條董志原回
巢蕩平後敗殘之賊北竄官軍躡追經過慶陽及所屬
之安化合水寧州以及涇屬崇信鎮原六城惟崇信尙
有居民餘皆空城人煙斷絕比卽分撥官軍漸次移營

進駐一面遴訪甘肅人員暫理府縣各篆招輯流亡計
口散糧以延喘息並給籽種農器督勸丁壯及時耕種
以規久遠擇險隘爲兵屯統領營官主之就堡寨爲民
屯府州縣王之均因其地之所宜按節候播種粟藁蕎
麥諸種督課軍民日事鋤耨耕牛不能多得則以古昔
區田代田之法示之冀獲有秋重謀生聚難民來歸者
漸多則賑糧亦漸增墾地漸廣則籽種亦漸費凡所規
畫諸是草創祇能隨宜部署不能預立規模預計經費
各守令以熟悉風土稍知稼穡艱難能恤民隱能共作

昔者爲上選幹吏尙非所急也慶陽府一缺轄境寬闊
蓋志原迤東一路皆其屬地查有前甘肅環縣知縣藍
翎逆同銜升用直隸州知州翁健康慈篤實久著循聲
堪以委署慶陽府篆城內衙署倉庫廬舍蕩然無存先
於正甯甯州合水附近郡城處所駐紮巡行一俟難民
漸歸故土乃能入城治事安化縣一缺查有運同銜甘
肅卽補知縣丁珮璐人尙耐苦堪以委署甯州一缺查
有同知銜分省補用知縣黨鎮實心愛民堪以委署鎮
原縣一缺查有候選知縣廖溥明樸實明幹堪以委署

崇信縣篆查有留陝候補知縣李世瑛勤樸耐勞尙無
習氣堪以委署諸城皆收自灰燼之餘從新締造與草
昧經營無異若循例檄司遴委誠恐不盡得人且荒苦
之區雖委署有人而捧檄經年不能赴任者比比而是
親民之官豈宜久曠勢不能不破除文法就近遴委且
薄給盤費薪水以資辦公免其枵腹從事庶可冀其安
心求治宣布

朝廷德意拯此殘黎區區之愚並懇

飭下吏部陝甘兩省委署府廳州縣各缺暫准督撫臣

遴才委用勿拘以例法庶於時局不無小補所有委員署理府州縣各缺緣由謹會同幫辦陝甘軍務署陝西撫臣劉典合詞具陳伏乞

皇太后

皇上聖鑒訓示施行謹

奏

同治八年五月十九日

同治八年五月二十五日內閣奉

上諭左宗棠奏遴員署理府州縣各缺請勿拘成例一摺甘肅慶陽一帶地方甫經收復辦理賑墾撫輯事宜

均關緊要該督遴才委任自係爲地擇人所有慶陽府知府各缺著准其以升用直隸州知州翁健等署理嗣後陝甘兩省委員各缺著該督撫等斟酌情形變通辦理總期有益地方毋得濫行委用倘該員等於地方事務未能措置裕如著卽隨時撤參毋稍遷就該部知道欽此

甘肅臬司張岳齡開缺片

再甘肅臬司張岳齡統領平江三營駐紮汧陽自同治七年二月迄今一載有餘每遇逆回竄犯均經隨時擊

退斬敵甚多秦隴之交深資翼蔽各次捷狀業經據實
陳明本年入春以來張岳齡因舊患中寒諸證增劇乞
假調治臣以該員曉暢戎機所部尙稱得力飭其帶隊
赴秦州在營養病聊資鎮壓飭管帶安營鹽運使銜分
發補用道湯聘珍幫其帶隊打仗俾得安心調理以冀
速痊適接張岳齡來稟所患日益沈重近更增暈厥之
證不但不能乘騎且起立需人參扶時虞顛壓師期已
迫而病勢委頓有加極思輿疾前往又恐貽誤戎機懇
奏請開缺回籍遵員接帶所部平江營前來臣覆核張

岳齡所患病證縣燬益甚年已五十血氣就衰萬難速
愈當飭現帶輔營花翎二品頂戴陝西卽補道李耀南
接統平江三營仍以湯聘珍幫同統帶飭卽拔赴秦州
張岳齡本任甘肅臬司缺應懇
天恩迅賜簡放以重職守伏乞

聖鑒訓示施行謹

奏

同治八年五月十九日

同治八年五月二十五日內閣奉

上諭左宗棠奏臬司患病懇請開缺等語甘肅按察使

張岳齡著准其開缺回籍調理所遺員缺著崇福補授
欽此

黃鼎攻克安家山寨片

再甘肅涇州所屬鎮原縣介居環慶平固之間地當衝
要收復之後委官經理訪有縣屬安家山寨土匪惠常
魁嘯聚多人肆行焚掠其附近梁家源等處堡寨遺民
被其脅制莫敢誰何統領彝字營陝安道黃鼎駐軍涇
州三月三十日派都司封虎臣帶涇防勇丁百名先往
宣諭惠常魁喉黨開放鎗礮迎拒外委田澤波陣亡勇

丁傷亡者七名黃鼎帶隊繼至令差弁陳占魁復往諭以誅止渠魁之意惠常魁仍抗拒如故陳占魁亦被鎗子洞穿左臂黃鼎周覽山寨形勢三面峭壁下臨深濠寨踞山巔無路可上該匪等由濠中鑿竇出入有警則寨上木石齊下兵不能從濠中進攻黃鼎乃令各營扛劈山礮由寨對面連環轟攻晝夜不息陰選士卒於四之兩旁開掘地道三處七晝夜地道成實火藥其中四月初六日寅刻地雷發轟塌山寨右角壯士自缺口躍入遇匪卽斫立斃悍匪百餘名惠常魁傷重投井而斃

地窖內搜出匪黨惠勛魁等數十名斬之拔出婦女老
弱百餘名景家源寨民景之敬景之惠等乃涕泣詣營
求撫黃鼎受之匪寨平自此而土匪始識兵威良善乃
可復業是役雖斬賊無多而官軍之勞數倍於尋常戰
事蓋地險非可力攻也陣亡之外委田澤波應請

旨飭部議卹以慰忠魂謹據實附陳伏乞

聖鑒訓示施行謹

奏

同治八年五月十九日

軍機大臣奉

旨田澤波著交部議卹欽此

陝省報捐各生捐冊由西征糧臺咨部片

再臣以餉項奇絀不得已而議及捐輸因臣與撫臣督師勦賊無一定處所陝省捐局司道詳請由營咨部輾轉稽延捐生未能踴躍經臣咨行辦理西征糧臺袁保恆將陝省甘捐改歸該學士專管並由該學士奏明將凡在陝省報捐各生捐冊卽用糧臺關防咨部以期迅速而廣招徠查現在陝境肅清兵事漸順正宜固秦規隴遄赴戎機而各省協餉斷缺不時致諸事有停待之

苦計惟多方籌措冀多得一分實餉多辦一分實事卽
多收一分以效庶竭餉鈍少報涓埃擬於山東江蘇浙
江福建四省均添設甘捐分局卽令捐局委員將各生
捐冊就近造送各該督撫代爲咨部以免稽遲是否有
當謹附片具陳伏乞

聖鑒訓示施行謹

奏

同治八年五月十九日

軍機大臣奉

旨戶部議奏欽此

劉厚基稟報軍情不實請

旨懲處片

再逆目袁大魁以淮北髮捻前年隨捻首張總愚入陝嗣因官軍追截未及渡河過晉而仍留踞宜川之雲巖鎮築城結寨負隅肆擾冀圖伺使入晉上年六月經劉瑞冕魏光燾將雲巖賊巢攻破庫克吉泰劉典馳奏時據生擒賊供袁大魁存亡均無確據一面檄劉厚基等認真搜剿務絕根株嗣接劉厚基馳報七月十九日飭總兵劉厚填追剿袁大魁二十三日抵延川安家河斃賊四五百名卽帶擒獲之匪黨徐天寶劉人升令其指

引迫及延川之西溝口斃賊不少又追二十餘里陣斬二百餘名徐天寶用洋鎗擊袁大魁洞穿胸膛登時伏誅庫克吉泰劉典比又據以入

告昨攻克老巖密割取袁大魁首級梟示各被害地方檢閱舊卷劉厚基據劉厚填稟徐天寶擊斃袁大魁一節委係憑空捏造而原牘粉飾甚工竟無從窺其破綻軍興日久習氣日深將領多由行列出身目嫌不文每以厚資延友代草疏牘而浮偽之徒即恩跡其中動以工於作偽取重主人以致營中是非失實若輩之營求

者小兵事之貽誤者大也臣於去冬西旋時劉厚基經
臣前年保奏後漸露虛憍之意所陳戰事多涉鋪張曾
於緘牘中戒其勿近華士致因人受累此次據其弟劉
厚垣之稟說報袁大魁死狀其有心徇飾可知昨收復
綏德州時劉厚基報稱曾帶所部至田莊等處臣曾據
以入

奏旋接劉松山呈稱則並無其事誕妄類此若各軍尤
而效之陝甘軍務其能望有起色乎應請

旨將記名提督延榆綏鎮總兵西林巴圖魯劉厚基以

提督記名之處註銷並撤去勇號暫留榆綏鎮總兵往
以觀後效記名總兵劉厚瑱請

旨以都司降補其當時辦稿文案幕友由臣勒令驅逐
出營以爲欺罔者戒是否有當伏乞

聖鑒訓示施行謹

奏

同治八年五月十九日

同治八年五月二十五日内閣奉

上諭左宗棠奏請將捏報軍情各員分別懲辦等語記
名提督陝西延榆綏鎮總兵劉厚基稟報軍情多有不

實又聽其弟記名總兵劉厚垣捏報粉飾鋪張實屬咎
有應得劉厚基著撤銷記名提督並撤去勇號暫留本
任劉厚垣著以都司降補以示薄懲該部知道欽此